

## UNTER DEM LAMBERTITURM

Wat is in Oostfriesland en „KBV“? Wat 'n Fraag, dat weet doch elke Kind – en Klootscheter- un Boßelvereen. Stimmt nich ganz. Up Spetz hett sük annerlestens ok en „KBV“ gründt. Boßeln up 't Fehn? Dat gifft dat bit nu blot in Akelsbarg. Up Spetz hett de „KBV“ nix mit Boßeln to doon. „KBV“ steiht hier för „Karkenbauvereen“. Wat sall dat denn, mag nu de een of anner denken, de Spetzers hebben doch en Kark an 't Dwarsende un mit Hermann Reimer ok en Pastoor, de vööl Minsken kennen – nich blot up Spetz. Nee, up Spetz sall kien neje Kark baut worden, de Christus-Kark van 1970 sall 'n Anbau kriegen. Warum dat nu? Vör nett sowat veer Jahr gaff dat in dat Gemeentehuus, waar ok de Pastoor mit sien Froo wohnt, en Malöör. Dat Huus sull en nejen Wateranschluss kriegen. Daarbi gaff dat en Versehn. De Mannlüü hebbt 'n ollen Anschluss funnen, de all lang stillegett was. Denn gaff dat de Wateranschluss, un vööl dusend Liter Water sünd dör de oll Anschluss direkt in dat Huus lopen – 't stunn all unner



Water, Pastoor sien Sluren swummen dör d' Stuuv. Dat Huus was nu nich mehr bewohnbar. Dat neje Huus för de Pastorenfamillje mit Büro is al klaar. Nu fehlen noch Rumen för de Gemeentearbeid – för de vööl Gruppen, de dat in disse aktiv Gemeinde gifft. Nu sall en Bauvereen helpen, an Geld to komen. De Vereen gifft dat al, mit Vörsitter un en Stück of wat Leden. „Dat köönt noch vööl mehr worden“, leet Pastoor Reimer sük hören, un up de Webbstee van de Kark gifft dat bold 'n Formular to Utdrucken. Plaant is en Anbau an de Westsied von de Christus-Kark. Un so en Bauvereen kann ok Spenden insammeln. Wiel de Vereen denn van 't Finanzamt as „gemeinnützig“ betekent word, kann man de Spenden ok van de Stüür ofsetzen.

**Hinni Trauernicht**